

prés, se cachans d'arbres en arbres, tirans fort adroitement; ils déchargeoient toute leur fureur sur la barque, sçachans que Monsieur le Gouverneur estoit dedans; & en effet, si elle n'eust esté bien pauoisée, ils auroient bleffé & tué plusieurs de nos hommes; vne épée Françoisse paroissant au dessus des pauois, fut emportée d'un coup d'arquebuzes, plusieurs cordages coupés, & les pauois tous remplis de bales. Ils firent leur retraite dans vne bonne conduite; car ils enchargerent à leurs arquebusiers de combatre vaillamment, comme ils firent, pendant qu'ils transportent à trauers des marais & des bois, leur bagage & leurs canots, pour n'estre point apperceus. La nuict venuë ils éuaderent, comme i'ay remarqué cy-dessus: Voila comme la guerre, avec ces peuples, s'est declarée plus que iamais; mais voions ce qui fuit.

Ils estoient partis cinq cens bons guerriers de leur pais, comme i'ay desia dit, vne troupe s'en estoit allée au deuant des Hurons, pour leur dresser des embusches, [171] & les attendre comme on attend vne beste à la fuë; estans aux aguets, ils apperceurent deux canots qui nous amenoient le Pere de Brebeuf, & quelques François; mais les ayans découuerts vn peu tard, dans vn lieu où ils se pourroient sauuer à force de rames, ils les laisserent passer sans leur donner la chasse, ny sans se decourir: Ce fut vn grand trait de la bonté, & de la prouidence de nostre Seigneur enuers le Pere, & enuers ceux qui l'accompagnoient: car cinq autres canots de Hurons, venans vn peu apres, furent attaqués de ces voleurs, qui en massacrerent quelques-vns, d'autres se sauuerent, d'autres tomberent tous vifs entre leurs mains, pour estre le ioiet des flammes & de leur rage, & la pasture de